

HSET GALATI

Phaulô achìh ka mangai Galati

Bàu hmàih ka oh daq

¹ Phaulô broq mangai Tiaq cla da Christ ùh xài enh kon mangai, hadai ùh i canòm qmòe ka cabô thê, mahaq enh cla Chuaq Jesus Christ xam Boc Plình aih Baq, Mangai ma broq ka Chuaq Jesus khoe rìh hlài enh mangai cachit.

² Xam dìq dõng oh daq oe pajùm ti au, achìh am ka bài Tagop Hadròeh oe gùng Galati.

³ Waiq ka oh daq jah kan catèm xam kan tabàih dech enh Boc Plình aih Baq xam enh Chuaq Jeus Christ aih Chuaq da bèn.

⁴ Haq aih mangai khoe cachit am ka yiniq lui bèn, òe q hu dèch bèn jah claih enh qnhòng ngang dù kô, wop qmang ka manoh Boc Plình, aih Baq bèn,

⁵ Kan ranhòm mòeq òe ùh lùch jah dìq ta haq! Amen.

I mòeq Bàu Lem raq

⁶ Au hamàih ka oh daq ma rênh ka cađac mangai ma creo ka oh daq trùh rìh ta kan tabàih dech da Christ, òe q hu cadàu tiaq bàu lem ma qnoeq.

⁷ Joq qnàng ùh i ka bàu lem ma qnoeq, mahaq i toq bài mangai enh broq ka oh daq loh ka manhài ta manoh, rai enh raliang đac Bàu lem da Christ.

⁸ Mahaq tàng i cabô, yac ka cla nhèn, yac ka bình plình oe ta plình, hnài ka oh daq bàu lem ma

qnoeq crài ka Bàu lem da nhèn ma khoe hnài oh đaq, mangai aih khoe khòh ka Anathem.

⁹ Au khoe doe, kô au anoe hòh: Tàng joq loq i cabô hnài ka oh da bàu lem ma qnoeq crài ka Bàu lem oh đaq ma khoe jah, mangai khòh ka Anathem đac hloe!

¹⁰ Manòeq kô, au àu òòeq yỏc manoh kon mangai, loq òòeq jah manoh Boc Plinh? Tàng joq au oe raq enh broq lem manoh kon mangai, au pi xài hapỏng da Christ.

Phaulô khoe jah Boc Plinh creo

¹¹ Manòeq kô au anoe dỏq pi oh đaq loq rameh: Bàu lem au khoe hnài, aih ùh xài loh enh kon mangai;

¹² majah qmang aih au ùh i tàng, ùh i yỏc Bàu lem aih enh cabô, mahaq au khoe jah qmòe enh cla Chuaq Jesus Christ mahnu am ka au.

¹³ Majah qmang aih, oh đaq hmaq tàng adroe nèh au tiaq trong da mangai Judà, au rìh acaq qmang leq cadèh, au ti khech rùp rai ti raliang đac Tagop Hadròeh da Boc Plinh oe palap cleq;

¹⁴ hadai nhèn mangai mòeq lỏp mòeq diac ma hanoh tiaq trong da mangai Judà au yì loe đỏng ka wì qnoeq, au nheth pi cajaq trong wẻq tiaq bàu boc yaq nhèn ma qmon enh nèh.

¹⁵ Mahaq apang jò Boc Plinh haq ma khoe ràih òòeq au enh jò au oe raq ta cliac miq, yỏc kan tabàih dech òòeq creo ka au.

¹⁶ Haq khoe lem manoh òòeq mahnu dẻh kon haq am ka au, òòeq au jah anoe Kon aih am ka mangai diac wì, tajòe qmòe au pi gỏm hatinh ka wa xech wa akia.

¹⁷ Au hadai ùh tǒc ta Jerusalem, ðòeq glàm bài mangai Tiaq cla ma adroe ka au, mahaq au lam tagùng Arabi, atìq ka aih au hlài ta Đamat.

¹⁸ Khoe èh piq hanam atìq ka aih, au tǒc ta Jerusalem, ðòeq ta canau ka Sêpha, au oe ti haq mòeq jàt padam hì,

¹⁹ mahaq au ùh hnoq qmòe mangai qnoeq enh gùng ka Jaco aih oh da Chuaq.

²⁰ Joq qnàng enh ngèa Boc Plình, rìm yiniq au achìh ka oh daq kô au ùh qnùt.

²¹ Khoe aih au lam ta cròng Siri xam gùng Silisi,

²² jò aih bài Tagop Hadròeh da Christ tagùng Judê qnhòq lòm canau ka au.

²³ Wì haq toq hìa tàng doe: Mangai ma toq ti chaq rùp bèn adroe kô nèh, manòeq kô haq aih qnang hnài trong haq ma àu raliang đac nèh haq.

²⁴ Aih iq, nen ajang au wì haq majah toq manè apôi Boc Plình.

2

Tagop Hadròeh ta Jerusalem carùp tì ka Phaulô

¹ Khoe aih, mòeq jàt pôn hanam, au tǒc hòm ta Jerusalem tì Banaba, i qnong Tit lam tiaq ma.

² Au iu tiaq bầu mahnu, tǒc ta aih ðòeq taqmon hlài Bầu Lem au khoe hnài ka mangai diac wì dōq oh daq jah loq, mahaq au taqmon hlài toq ka wì ma broq gàu Tagop Hadròeh, majah qmang aih au waq ka jah panhìn ðòeq biac cadàu da au enh nèh trùh mamòeq ùh hìaq ngwan.

³ Yac kaTit, mangai ma lam tiaq au aih mangai Gorec, mahaq dua ùh hìaq ep broq ramènh kat akia.

⁴ Nhèn majah broq qmang aih, taiq i biaq ngai patiah deh hanoh broq oh daq, mùt taqne nhèn hu ti achop rinh ngan cwàng da nhèn jah enh dalam ka Chuaq Jesus Christ, òòeq rùp nhèn broq òòeq broq hapõng.

⁵ Nhèn ùh talùi ka wì haq yac ka toq xit hnha, blinh qmòe nhèn ùh oe enh qneq ka cwàng da wì haq, òòeq kan joq qnàng da Bàu lem jah hagau taqne oh daq.

⁶ Anoe trùh mangai ma i bang tiang ma haqnheq wì ma iu camaih dèh raya (yac ka enh nèh wì haq mangai qmang leq, aih dua ùh ep cleq ka au, Boc Plình ùh i yi loq waq ka cabô) wì aih hanoh ùh tam mòeq nà bàu cleq ta bàu hnài da au.

⁷ Majoq qnàng aih, wì haq hnoq bìac hnài Bàu lem ka mangai ùh broq ramènh kat akia Chuaq khoe thê au, tiàh ka bìac hnài Bàu Lem ka mangai broq ramènh kat akia ma khoe thê Phiero diq

⁸ Majah qmang aih, Boc Plình ma khoe broq ta manoh cliac Phiero, òòeq thê haq broq mangai tiaq cla am ka mangai kat akia hadai broq ta manoh cliac òòeq thê au broq mangai tiaq cla am ka mangai diac wì

⁹ jò Jaco, Sêpha, Jon, aih bài mangai wì ma ngan tiàh dèh ka long jrang kàn, wì canau kan tabàih dech khoe jah am ka au, wì hnhu kông pah qma hu carùp tì ka ma Banaba, òòeq ma lam trùh ta mangai diac wì, wì haq aih lam trùh ta mangai khoe broq ramènh kat akia.

¹⁰ Wì aih toq tanap ka au ep hmàng trùh mangai pa, trong aih au hadai khoe nhet ka broq haraya.

Phaulô tagàih ka Phiero

¹¹ Mahaq jò Sêpha trùh ta Antiôt, au i tagàih enh ngèa ka haq, majah qmang aih haq broq joq khoe ùh troq.

¹² Jò mangai Jaco thê lam qnhòq i trùh, aih haq acaq pajùm ti mangai diac wì, yàng jò wì bu trùh haq padinh yòng lah ðeh oe crài, majah qmang aih haq yùq ka òai mangai khoe broq ramènh kat akia.

¹³ Òai mangai Juđa qnoeq hadai top dua ùh wìa qmang aih, jaq Banaba hadai loh qmòe ka broq tiaq kan ùh wìa da òai aih.

¹⁴ Mahaq jò au hnoq wì haq lam ùh jang tiaq kan joq qnàng da Bàu lem, enh ngèa bàc ngai, au doe ka Sêpha: “Tàng ìh kô mangai Juđa, mahaq acaq oe hadai hatiah ka mangai diac wì, ùh tiaq ranenh da mangai Juđa, aih hagleg ìh majah thê mangai diac wì tiaq ranenh da mangai Juđa?”

¹⁵ Nhèn kô jò ha-uang loh aih khoe mangai Juđa, ùh xài mangai i yiniq lui loh enh mangai diac wì.

¹⁶ Yac ka qmang aih, bèn loq kon mangai jah kan taq atoq, ùh xài canòm ka broq tiaq trong ranenh thê, mahaq canòm ka manoh lùì enh dalam ka Christ, dài haq nhèn majah khoe lùì Chuaq Jesus Christ, ðòeq hujah wìa mangai taq atoq tiaq manoh lùì enh dalam Christ, ùh xài canòm ka broq tiaq trong ranenh thê, majah qmang aih ùh i cabô broq tiaq trong ranenh thê ma jah kan taq atoq.

¹⁷ Mahaq, tàng joq nhèn qnang chaq broq qmang leq hujah kan taq atoq enh dalam ka Christ, yàng wì doe nhèn mangai i yiniq lui, tàng

qmang aih Christ aih ma hapǝng da yiniq lui qmòh? Ûh lòm qmang aih!

¹⁸ Joq, tàng au dèch paqnàng hlài yiniq au ma khoe raliang đac, aih ajoq cla au raq doe đeh kô khoe ùh troq ka ranenh.

¹⁹ Majah qmang aih, tiaq ranenh, au khoe cachit am ka ranenh, đòeq hu rih ka Boc Plinh.

²⁰ Au khoe tiang đình pajùm ti Christ ta long pagat, manòeq kô au rih, aih pi xài au rih hòm, mahaq Christ rih oe enh dalam ka au, manòeq au rih ta xech akia kô, aih au rih ta mannoh lùl kon Boc Plinh, haq ma loq waq ka au, chiuq cađac rađeh hu cachit am ka au.

²¹ Au ùh enh dōq kan tabàih dech da Boc Plinh loh đac ka qngwan, tàng broq tiaq ranenh men jah kan taq atoq, qmang aih Christ cachit hi qngwan qngwaiq.

3

*Canòm ka manoh lùl loq canòm ka broq tiaq
Ranenh men jah taq atoq*

¹ Wùih! mangai Galati ma blùng tau, cabô khoe tah ka pì canàih, bài mangai adroe kô nèh loq ka Jeus Christ khoe tiang đình talong pagat tiah gleq hnoq qmòe ajang mat?

² Au bōch pì moèq bàu qmang kô: Aih iq canòm ka broq tiaq trong ranenh thê, loq canòm ka anòe tàng èh lùl oh daq ma khoe jah Yiang Hadròeh?

³ Gleq oh daq majah blùng hrìn qmang aih? Adroe aih khoe canòm ka Yiang Hadròeh hagleq manòeq kô aih ma hi loh ka canòm ka xech akia đòeq hu pagêh?

⁴ Oh daq chiùq bàc xalep qmang aih òeq hu dech do qmòh? Tàng qmang aih joq hi qngwan!

⁵ Boc Plình am Yiang Hadròeh rai broq bàc kan halac qne oh daq, aih tiaq trong ranenh thê loq taiq oh daq lùì bàu oh daq ma khoe tàng?

⁶ Tìah ka Apraham lùì Boc Plình, aih hi jah creo ka haq mangai taq ataq.

⁷ Qmang aih oh daq khòh loq rameh: Bài mangai leq i manoh lùì, aih ma joq kon xau joq qnàng da Apraham.

⁸ Hset Hadròeh khoe loq adroe Boc Plình hanoh creo ka mangai diac qnoeq jah kan taq ataq tiaq manoh lùì, dài haq majah chònh doe ka Apraham Bàu lem kô: “Rìm taneh diac òiq canòm ka ìh hujah xôq ramot”.

⁹ Qmang aih, waq toq cabô lùì, haq hi wiang jah xôq ramot ti Apraham aih mangai i manoh lùì.

¹⁰ Majah qmang aih, rìm ngai ma canòm ka biac broq da ranenh, aih òiq oe enh qneq ka kan hamaiq, majah qmang aih i bàu achìh rameh: “Joq ra-òh hamaiq qnàng ka bài mangai ma ùh cajap manoh ta rìm yiniq khoe achìh ta hset ranenh òeq broq tiaq bài yiniq aih”.

¹¹ Joq qnàng ùh i ka cabô broq tiaq ranenh mahaq jah kan taq ataq enh ngèa Boc Plình, trong aih joq wop, majah qmang aih mangai taq ataq rìh tiaq manoh lùì.

¹² Ranenh ùh pajùm ti manoh lùì, mahaq ranenh achìh rameh: “Mangai leq iu tiaq ranenh hi rìh canòm tiaq dèh aih raq”.

¹³ Christ khoe baxon ahlài bèn claih enh kan hamaiq da ranenh, majah qmang aih Haq khoe wìa kan ra-òh hamaiq am ka bèn majah qmang

aih i bàu achìh: “Joq ra-òh hamaiq qnàng ka mangai wì ma atua tồc talong.”

¹⁴ Dôq xôq ramot ma am ka Apraham canòm ka Chuaq Jesus Christ jah ta ùc jàp jìa ka mangai diac qnoeq, qnah hò m ò òeq bèn canòm ka manoh lù hujah yóc Yiang Hadròeh, ma khoe têu am.

Bàu Boc Plình têu am khoe i adroe ka ranenh

¹⁵ Yôiq oh daq, au capoch tiaq bàu kon mangai ma loq doe: Jò wì khoe gêh ka jàiq tajao, pi i bô oe jah raliang, oe jah tah tam cleq ta aih hò m.

¹⁶ Manòeq kô, bài bàu têu am khoe jah am ka Apraham xam nang noe haq. Hset Hadròeh ùh xài doe: “am ka bài nang noe kon mangai”; tìah am ka bàc mangai, mahaq doe: “am ka nang noe da ìh”, qmang ka anoe trùh mòeq ngai raq, aih Chuaq Jesus Christ.

¹⁷ Qmang aih au doe aih ràmeh: Pôn hrinh piq jàt hanam atiq men i hset ranenh, dài ma ùh jah raliang đac Bàu tajao Boc Plình broq khoe gêh deh adroe ka aih, ranenh hadai ùh broq ka bàu têu am loh đac ka qngwan qngwaiq.

¹⁸ Majah qmang aih, tàng joq tiaq ranenh bèn jah kùng hang, aih pi oe tiaq bàu ma têu am. Mahaq Boc Plình am ka Apraham kùng hang tiaq bàu Haq khoe têu deh adroe.

¹⁹ Tàng qmang aih ranenh òeq broq cleq hò m? Ranenh neo qnoh ònh atiq, taiq kon mangai broq toq yiniq lui, gòm jò Kon da nang noe jah trùh, aih Mangai ma khoe i bàu têu deh adroe, ranenh khoe jah qnoh am enh bài bình plình èh jah anoe hlài xi mòeq ngai oe taqne.

²⁰ Mangai taqne aih ùh xài taqne ka mòeq apah raq, mahaq Boc Plình aih i mòeq raq.

Ranenh ajèn aràng trùh ta Christ

²¹ Tàng qmang aih, ranenh pagau hlài ka bàu Boc Plình ma tèu am qmòh? Ûh lòm qmang aih! Tàng joq khoe qnoh am ranenh hlàt dèch kon mangai jah kan rìh, aih èh kan taq atoq hadai loh enh ranenh.

²² Mahaq Hset Hadròeh khoe clêh rìm yiniq oe enh qneq ka yiniq lui, dôq bàu ma khoe tèu, enh dalam ka Christ jah am ka mangai lùì.

²³ Jò kan lùì qnhòq trùh, bèn dìq oe enh qneq ka ranenh, hu gòm kan lùì jah paqnoh.

²⁴ Qmang aih ranenh tiàh ka mangai hnài òòeq hu ajèn aràng bèn trùh ta Christ, òòeq canòm ka manoh lùì bèn jah wìa kan taq atoq.

²⁵ Qmang aih jò manoh lùì khoe trùh, bèn pi ep oe enh qneq ka cwiang da mangai hnài aih hòh.

²⁶ Aih ìq, enh dalam ka Chuaq Jesus Christ, bèn dìq jah broq kon Boc Plình.

²⁷ Oh daq dìq khoe jah baptem enh dalam ka Christ, dìq khoe jah caxùnh yòc Chuaq Jesus Christ.

²⁸ Qmang aih, pi i ka mangai Juda, pi i ka mangai Gorec hòh, pi i mangai broq dïc, pi i mangai broq dèh cla hòh, pi i gualô gucadrì hòh, majah qmang aih enh dalam Christ oh daq wìa mòeq raq.

²⁹ Tàng joq oh daq joq qnàng mangai da Christ, oh daq aih nang noe da Apraham, aih bài mangai wiang jah hang tiaq bàu ma khoe tèu am.

4

Kon mangai oe enh qneq ka ranenh xam enh qneq kan tabòeh dech

¹ Manòeq kô au doe rameh, mangai wiang jah kùng hang yac ka haq broq craq dìq dǒng kùng hang aih jò haq oe raq qyoh ùh i crài cleq ka hapǒng.

² Haq ep oe enh qneq ka cwìang mangai ma ranenh am, trùh jò baq haq ma khoe pajaq òeq adroe.

³ Bèn hanoh qmang aih, jò oe raq kon qyoh, ep iu tiaq ranenh da crǒng taneh.

⁴ Yàng jò ma pajaq khoe jah gêh. Boc Plình thê dèh Kon haq ha-uang loh enh mòeq ngai gucadrì, ha-uang loh enh qneq ka ranenh,

⁵ hu baxon yǒc bài mangai oe enh qneq ka ranenh, am bèn jah broq kon ban da haq.

⁶ Taiq oh daq aih kon haq, dàl Boc Plình majah khoe thê Yiang Hadròeh da Kon haq mùt ta manoh cliac bèn, Yiang aih creò: Aba! Baq!

⁷ Qmang aih oh daq pi xài hapǒng dìc hòm, mahaq khoe wìa kon, tàng khoe wìa kon, aih èh hadai wìh wìa mangai jah kùng hang canòm enh kan tabàih dech da Boc Plình.

⁸ Nèh haq, ùh qnì ka Boc Plình, oh daq broq dìc bài kiac mahaq ùh xài kan kiac.

⁹ Yàng manòeq kô khoe jah loq ka Boc Plình, Boc Plình hadai loq ka oh daq, aih hagleq majah oe tawìh hlài hu broq dìc, iu tiaq bài ranenh ùh loh cleq aih?

¹⁰ Oh daq oe raq wèq ranenh hì, khê, jò, hanam qmòh?

¹¹ Au loq yùq am ka pì, au yùq qngwan ka au khoe abroq xalep taqne pì.

Mangai Galati tablòq manoh

¹² Au cali calo ka pì oh daq, thê pì tiah ka au, majah qmang aih au hadai tiah ka pì. Oh daq ùh i broq habo cleq ka au.

¹³ Oh daq loq jò chac au ma diq jaq ùh nèn au khoe aràng Bàu lem ka oh daq yàng baxèm,

¹⁴ pàng chac hamac au ùh nèn dài majah khoe tiah ka nen hu qnhro oh daq, yac ka oh daq ùh i jù lê au, ùh chàih cađac au, mahaq đìh au tiah ka bình plình da Boc Plình, tiah qmòe cla Jesus Christ.

¹⁵ Manòeq aih, kan lem bùi da oh daq nèh khoe taleq? Au anoe ka oh daq loq, nèh haq oh daq loq waq ka au, tàng majah aih oh daq chiùq bõc dèh clong mat am ka au.

¹⁶ Au yõc bàu joq qnàng anoe hnài oh daq, hagleq au majah loh mangai tablêq hlài ka oh daq?

¹⁷ Bài wì aih, hnoq wì ma nhet ka oh daq, aih ùh xài wì lem manoh cleq ka pì, mahaq wì enh oh daq talah ka nhèn, dôq oh daq nhet ka wì haq.

¹⁸ I mannoh loq nhet ka biac lem aih troq, jò leq hadai qmang aih, ùh xài toq jò i mat au.

¹⁹ Yôiq wì kon, taiq pì kon au majah chiùq kan jìq da mangai ha-uang, trùh jò leq Christ jah gèh ta dalam oh daq,

²⁰ Au ngèh manòeq kô, chop au jah oe ti pì òòeq hujah hatuàng ka pì majah qmang aih pì broq ka au joq xa ka hèm qnàng.

Aga sam Sara

²¹ Anoe ka au beq, pì oh daq mangai ma enh rìh enh qneq ka ranenh, pì ùh qnì tàng ranenh anoe cleq qmòh?

²² Majah qmang aih i bàu achìh rameh Apraham i baiq ngai kon calô: Mòeq aih kon da mangai gucadrì broq ðeh hapǒng, mòeq aih da mangai gucadrì broq dèh cla.

²³ Mahaq kon da mangai broq hapǒng aih ha-uang tiaq xech akia, kon da mangai gucadrì broq dèh cla aih ha-uang tiaq bàu Boc Plình khoe tèu am adroe.

²⁴ Dìq baiq ðòeq àliah rameh: Baiq ngai gucadrì aih baiq bàu tajao, mòeq aih bàu tajao ta wang Sina-i, ha-uang kon ðòeq hu broq dìc hapǒng, aih da Aga.

²⁵ Manòeq kô, Aga aih wang Sina-i, oe tagùng Arabi, ùh i crài cleq ka Jêrusalem manòeq, plài aih xam kon da haq dìq broq dìc.

²⁶ Mahaq Jêrusalem enh qnhèq aih ùh broq dìc cabô, haq aih miq da bèn.

²⁷ Majah qmang aih i bàu achìh:
 “Yôiq gucadrì ma xon tau, ìh mangai ma ùh dùh ðeh ka ha-uang, drah lem bùi beq;

Ìh mangai qnhòq lah hmaq jìq ha-uang, drah dìq manoh lem bùi drah do ma dèh haq,

Majah qmang aih, kon da mangai cadrì wì ma khoe cađac, jah yeo bàc ùh hnau ka da mangai cadrì ma i ǒng”.

²⁸ Manòeq kô oh daq, bèn tìah ka Ysac, aih kon da bàu khoe tèu am.

²⁹ Mahaq qmang ka calah nèh, mangai ha-uang loh tiaq xech akia ti khech rùp mangai ha-uang loh tiaq cwìang da Yiang Hadròeh qmang leq, yac ka manòeq kô hadai qmang aih.

³⁰ Mahaq Hset Hadròeh anoe cleq? Drah hnan qnoh đac mangai gucadrì ma broq dïc qmat hloe xam kon da haq, majah qmang aih kon calô da mangai broq dïc ùh jah wiang pajùm kùng hang ti kon da mangai cadrì broq dèh cla.

³¹ Qmang aih, dïc ka oh daq bèn ùh xài kon da mangai gucadrì ma broq hapǒng mahaq bèn kô kon da mangai gucadrì ùh i broq hapǒng cabô.

5

Mangai tiaq Chuaq khoe jah paclaih

¹ Christ khoe paclaih đòeq bèn pì broq dïc, qmang aih drah yòng ma cajap, apaq dōq rađeh oe enh qneq ka long ech hapǒng dïc hòm.

² Au kô Phaulô au doe ka pì oh daq, tàng oh daq broq ramènh kat akia, aih èh Christ ùh i lòeq cleq ka pì hòm.

³ Au doe ka mangai ma broq ramènh kat akia, wì haq ep wèq dïc dǒng ka ranenh.

⁴ Tàng pì dïc enh canòm ka ranenh đòeq hujah kan taq atoq, qmang aih oh daq khoe talah enh gùng ka Christ, khoe hnhung kan tabàih.

⁵ Da nhèn aih, canòm manoh lùì xam Yiang Hadròeh nhèn men jah tangèh gòm kan taq atoq.

⁶ Majah qmang aih, enh dalam ka Chuaq Jesus Christ, yac kat akia, yac ka ùh, dïc baiq ùh i loh cleq, toq manoh lùì abroq enh dalam kan loq waq ma aih ma joq i lòeq joq qnàng.

⁷ Oh daq rabiaq ka cadàu, cabô khoe khech tât ùh am oh daq iu tiaq trong joq qnàng?

⁸ Kan baxrùq aih ùh loh enh Mangai ma creo ka oh daq.

⁹ Toq xit blo broq rèu dồng ka cađap dác.

¹⁰ Enh dalam ka Chuaq, manoh au lùì qmang kô, oh daq ùh baiq manoh, mahaq mangai ma broq ka oh daq loh ka rawè, ùh dèh ka cabô, haq aih jah pòq dèh kan baxa aih.

¹¹ Wùih oh daq, tàng joq au oe raq hnài trong ramènh kat akia, hagleq wì ma oe ti chaq rùp au? Tàng joq qmang aih, long pagat ma oe xài kan catoeh?

¹² Au ngèh dìq dồng bài mangai ma rai kan rawè taqne oh daq, wì haq pot đac rađeh aih yì ùh hnau hòm!

Plì da Yiang Hadròeh

¹³ Dìq ka pì oh daq da au, khoe jah creo trùh ta kan pì tawac, mahaq apaq yǒc kan pì tawac aih hu broq nen òeq hu rìh tiaq xech akia, mahaq drah yǒc manoh cliac loq waq òeq broq hapǒng dabau.

¹⁴ Majah qmang aih, dìq dồng ka ranenh yùp hlài ta mòeq bàu kô “Ìh ep loq waq ka mangai haten hatìa qmang ka cla.

¹⁵ Mahaq tàng oh daq hit qnhah dabau, ep ngan oq, yùq èh mangai kô loq cachit ka mangai tau.

¹⁶ Aih au majah doe: Drah cadiang tiaq Yiang Hadròeh, apaq pagêh tiaq trong xech akia ma enh.

¹⁷ Majah qmang aih, xech akia i dèh manoh enh crài ka trong Yiang Hadròeh enh, Yiang Hadròeh

enh trong crài ka trong xech akia enh, wa tablòq ka dabau qmang aih, dài oh daq majah ùh khòh broq tiaq trong deh enh broq.

¹⁸ Mahaq tàng oh daq canòm ka Yiang Hadròeh ajèn qnung, aih ùh hìaq oe enh qneq ka ranenh.

¹⁹ Yinìq broq da xech akia aih hnoq qmòe a mat: Taqnong tango, trong ùh sròeh, kan manhài,

²⁰ kùh waiq radua qmù, wê canàih, tagit, tablêq, tarèh, tanòeh, talech, ùh hatroq ka dabau, lah đac dabau,

²¹ da khwàiq, bù bia, plai toq ka acaq xam bəc yiniq qnoeq hatìah qmang aih. Au anoe adroe ka oh daq qmang ka au ma khoe doe: Mangai leq broq bõe yiniq qmang aih, haq aih ùh jah waq điac Boc Plìh.

²² Mahaq plì da Yiang Hadròeh aih: Loq waq, lem bùi, catèm, loq kèm, laq alàng, khun khuauq, ùh tabòq manoh, tabat, loq amàn.

²³ Ùh i ranenh leq ma ùh lòh bài trong aih.

²⁴ Bài mangai oe ti Chuaq Jesus Christ khoe tiang đình deh xech akia xam kan tango anang talong pagat.

²⁵ Tàng bèn rìh canòm ka Yiang Hadròeh, aih hadai ep cadiang tiaq Yiang Hadròeh.

²⁶ Apaq cadàu chaq bang tiàng ùh loh cleq ta qnhòng kò đòeq hu dakhwàiq rai tagit dabau.

6

Loq wiang blòh dabau

¹ Wì oh daq! Tàng loq i cabô troq broq yiniq lui cleq, oh daq aih mangai ma i Yiang Hadròeh, drah yòc manoh tabat đòeq hu bàt hlài wì haq, cla

oh daq hadai ep wèq rađeh diq, yùq oh daq hadai loq clìh ta kan padô qnùt.

² Drah wiang blòh kan trap ka dabau, qmang aih oh daq jah broq gêh ka ranenh da Christ.

³ Majah qmang aih, tàng loq i mangai ùh loh cleq, mahaq xoh rađeh kô canau gau ginh, aih mangai qnùt dèh cla.

⁴ Rìm ngai ep ngan hlài deh yiniq broq, aih hi hnoq kan catèh aih ajoq taiq cla, ùh xài taiq mangai qnoeq.

⁵ Majah qmang aih mangai ep gênh dèh hra.

⁶ Mangai leq jah wì hnài ka rađeh Bàu Chuaq, ep yôc rìm ta kùng hang đeh ma i ðòeq hu lah axong ka mangai hnài aih.

⁷ Apa qnùt rađeh, Boc Plình ùh jah blìa racaih, majah qmang aih cabô rai adrech cleq ep gat dèh adrech aih.

⁸ Mangai rai ka xech akia, enh xech akia aih haq jah gat kan om hech. Mahaq mangai leq rai ka Yiang Hadròeh, enh Yiang Hadròeh haq gat kan rìh halình mòeq ðòe.

⁹ Apa tagah ka broq bìac lem, majah qmang aih tàng joq bèn ùh hìaq patrò, waq toq hi trùh jò bèn hi jah gat.

¹⁰ Qmang aih, jò bu taglòm, drah broq yiniq lem ka rìm ngai, adroe aih am ka oh daq bèn ma hadai pajùm ta manoh lùì.

¹¹ Ngan tacô tì kống cla au achìh am ka oh daq, pliang chù joq gròq qnàng.

Ramènh kat akia...Long Pagat da Christ

¹² Dìq dõng bài wì ma enh broq ðòeq lem manoh kon mangai tiaq trong da xech kia, wì haq panan

oh daq kat akia, ðòeq ùh hìaq taiq long pagat da Christ i mangai ti rùp wì haq.

¹³ Majah qmang aih, yac cla wì haq khoe kat akia dua wì haq ùh i wèq tiaq ranenh taleq, mahaq wì enh oh daq kat akia ðòeq wì haq jah catèh raðeh ta chac oh daq.

¹⁴ Da au kô hòm, au ùh catèh raðeh enh gùng ka catèh toq long pagat da Chuaq Jesus Christ bèn, taiq long pagat aih, crông taneh kô au hnoq bu dàng khoe tiang ðình, crông taneh kô hnoq au hadai bu dàng aih!

¹⁵ Majah qmang aih trong ma yeo nhet aih ùh xài taiq kat akia loq ùh kat akia, wìh wìa kon mangai maneo aih trong ma yeo nhet.

¹⁶ Waiq kan catèm, kan loq waq trùh ti oh daq aih ðài mangai broq tiaq bàu kô, trùh hloe ti Isorali aih mangai da Boc Plình.

¹⁷ Pang kô ta èh, au ngèh apaq i cabô broq ka au ep hèm hòm, majah qmang aih ta chac au khoe pòq wê teo da Chuaq Jesus Christ.

¹⁸ Waiq kan tabàih dech da Chuaq JesusChrist bèn oe ti mahua yiang oh daq! Amen.

Hset Hadròeh
The New Testament in the Hre language of Vietnam,
translated by Baq Thi

Copyright © 2024 Baq Thi

Language: (Hre)

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-23

PDF generated using Haiola and XeLaTeX on 26 Jul 2025 from source files dated 23 Jul 2025

03fbbc53-13cb-5444-945a-741163b0252d